

## Mapaki a Hapang: Matla a Bopaki ba Motho



---

### SABATHA THAPAMA

#### **Bakeng sa Boithuto ba Beke Ena Bala:**

*Mareka 5:15–20, Mareka 16:1–11, Liketso 4:1–20, 1 Johanne 1:1–3, Bagal. 2:20, Liketso 26:1–32.*

#### **Teman'a Khopolo:**

“Hobane ha e le rona, ha ho kamoo re ka lesang kateng, ho bolela tseo re li boneng le tseo re li utloileng.” (Liketso 4:20).

**H**o na le matla a sa tloaelehang bopaking ba motho ka sebele. Ha lipelo tsa rona li futhumalitsoe ke lerato la Kreste 'me re fetoloa ke mohau oa Hae, re na le lesheoetla leo re ka le phurang ka Eena. Ke ntho e 'ngoe ho arolelana seo Jesu a se etselitseng motho e mong. Ke e 'ngoe esele ho arolelana ka seo a re etselitseng sona ka sebele.

Ho thata ho pheha khang ka boiphihlelo ba motho. Batho ba ka u phehisa khang ka tumelo ea hau kapa ka botoloki ba hau ba temana e itseng kapa ba hla ba soma borapeli ka kakaretso. Empa ha motho a ka re, “Nkile ka hloka tšepo empa joale ke na le tšepo; nkile ka tlaloa ke tsoalo le molato empa joale ke na le khotso; nkile ka hloka sepheo empa joale ke na le sepheo,” le babelaeli ba angoa ke matla a evangeli. Leha batho ba bang ba ka ba le boiphihlelo ba tšokoloho ea hang-hang e litaba-taba joalo ka ea moapostola Pauluse ha a le tseleng e eang Damaseka, hangata tšokoloho e etsahala ha motho a ntse a e-ba le tlhokomelo e ntseng e hola ea bohlokoa ba Jesu, kutloisiso ea mohau oa Hae o makatsang, le boikutlo bo phahameng ba teboho ka pholoho eo a e fanang ntle ho tefo. Kreste o fa maphelo a rona chalimo e fapaneng ka botlalo. Ke bona bopaki bona boo lefatše le bo hloakang ka thata hape le bo nyoretsoeng.

*\*Ithute thuto ea beke ena ho lokisetsa Sabatha sa la 11 Phupu.*

## Mapaki a sa Lebellhang

**Bala Mareka 5:15–20. Hobaneng ha Jesu a ile a romella monna eo Dekapolise ho ea pakela bahabo le metsoalle ho e-na le ho mo otl'a tumelong eo e ncha ka ho mo boloka a na le Eena?**

Lentsoe *Decapolis* le tosa mantsoeng a na: deca e bolelang leshome, le polis e bolelang litoropo. Tikoloho ea Dekapolise e ne e le tikoloho ea litoropo tse leshome tse neng li sikile ka leoatle la Galilea mongoaha-kholong oa pele. Litoropo tse na li ne li tlamahantsoe ke puo e le 'ngoe le moetlo o le mong. Motho enoa ea neng a na le batemona o ne a tsejoa ke batho ba bangata tikolohong eo. O ne a kenyelitse ba bangata matsoalo lipelong ka lebaka la boitsoaro ba hae bo hlaha bo sa reriseng ha bo tla. Jesu o ile a bona ho eena eo ho nang le se molemo ka ho fetisa seo a se nyoretsoeng, kahona a lopolla ka mohlolo monna eo batemoneng ba neng ba mo hloko-fatsa. Ha batho ba motse ba utloa hore Jesu o lumelletse batemona bao ho kena mohlaping oa bona oa likolobe, le hore likolobe tseo li tsubelletse selomong tsa itihela ka leoatleng, ba tla ho bona se etsahalang. Evangeli ea Mareka e tlaheha hore, “Eitse ha ba fihla ho Jesu, ba bona ea neng a na le batemona ba legione a lutse, a apere, a e-na le litaba; ‘me ba tšaba” (Mareka 5:15). Monna eo o ne a folile — ‘meleng, kelellong, maikutlong, le moeeng. Sepheo-pheo sa evangeli ke ho lokisa batho ba sentsoeng ke sebe ho ea botlalong boo Krete a ba bopetseng bona. A na ho na le motho ea fetisang eo ea neng a na le batemona ea ka arolelanang bopaki ba hae le tikoloho eohle ho fihlela litoropo tse leshome tsa Dekapolise? Ellen G. White o e beha ka makhetho: “Joalo ka lipaki tsa Jesu, re lokela ho bolela seo re se tsebang, seo re se boneng seo re se utloileng le ho ba le boikutlo ba sona ka borona. Haeba re ne ntse re latetse Krete khato ka khato, re tla ba le se nepahetseng seo re ka se bolelang ka tsela eo a re etelletseng pele ka eona. Re ka bolela kamoo re lekileng tšepiso ea Hae, ‘me ra fumana e tšepheha. Re ka fana ka bopaki ba seo re se tsebang ka mohau oa Krete. Bona ke bona bopaking bo batloang ke Morena, boo lefatšeng le timelang ke tlhokahalo ea bona.” — *The Desire of Ages*, leq. 340. Molimo o atisa ho sebelisa lipaki tse sa lebellhang tse fetotsoeng ke mohau oa Hae ho etsa phetoho lefatšeng la rona.

**Uena pale ea hau ke e fe; ke hore, pale ea tšokoloho ea hau? Ke eng seo u se bolellang ba bang ka tsela eo u tllileng tumelong ka eona? Ke eng seo u ka se neang motho ea sa sokolohang, ea ka fumanang molemo boiphihlelong boo u ka bo arolelanang?**

## Ho Phatlalatsa Krete ea Tsohileng

E ne e le hoseng ha letsatsi la Sontaha, ‘me bo-Maria ba babeli ba potlakela lebitleng la Krete. Ba ne ba sa ee ho kopa letho. Ke eng eo motho ea shoeleng a ka ba fang eona? Ha ba ne ba qetela ho mo bona, ‘mele oa Hae o ne o tletse mali, matetsetso, le maqeba. Liketsahalo tsa sefapano li ne li tsitsitse ka botebo likelellong tsa bona. Joale ba ne mpa feela ba etsa boikarabello ba bona. Ka pelo tse bohloko, ba leba ‘nqa ea lebitleng ho ea tlotsa setopo sa Hae ka litlolo. Meriti e metšo-metšo ea nyahamo e ne e koahetse maphelo a bona lefifing la ho lahlehela ke tšepo. Bokamoso bo ne bo le lerootho le tšepo e thekesela. Ha ba fihla lebitleng, ba ile ba makala ho fumana le le feela. Mattheu o tlaheha liketsahalo tsa hoseng hoo ha tsoho ka mantsoe ana: “Lenyeloi la bua, la re ho basali: Ha e le lona, le se ke la tšoha, hobane kea tseba hoba le batla Jesu, ea kileng a thakhisoa. Ha a sa le mona, hobane o tsohile’ ” (Matt. 28:5, 6). Joale basali ba ne ba hloletsoe ba thabile. Maru a matšo a masoabi a bona a ne a nyametse har’a mafube a hosaseng ha tsoho. Bosiu ba masoabi a bona bo ne bo felile. Lifahleho tsa bona li ne li khanya khotso, ‘me lipina tsa thabo tsa nkela meokho ea lillo sebaka.

**Bala Mareka 16:1–11. Maria o ile a etsa joang ha a fumana hore Krete o tsohile bafung?**

---



---



---



---

Kamor’a hore Maria a teane le Krete ea tsohileng, o ile a matha ho ea pheta pale eo. Litaba tse monate lia arolelanoa, ‘me o ne a sitoa ho khutsa ke hona. Krete oa phela! Lebitla la Hae ha lea tšela, ‘me lefatše le lokela ho tseba. Kamor’a hore le rona re teane le Krete ea tsohileng bohareng ba bophelo, le rona re loketse ho matha re ee ho pheta pale, hobane litaba tse molemo lia arolelanoa. Ho makatsa ha ka kang, hape, hore ho sa natse makhethlo oohle ao Jesu a ba boleletseng ka oona se tlang ho etsahala, hore o tla bolaoa ‘me o tla tsoha, barutuo—bane bao Jesu a ba khethileng ka ho khetholoha—ba khethile ho se lumele bopaki ba Maria. “Bao ha ba utloa hore o boetse oa phela, le hore o bonoe ke eena, ha ba ka ba kholoa” (Mareka 16:11). Ka mokhoa o joalo, haeba le bona barutuo ba Jesu ha ba ka ba kholoa hang, ha rea lokela ho makala ha ba bang ba sa amohele litaba tsa rona hang le teng.

**U qetsetse neng hore bopaki ba hau bo hano? U ile oa etsa joang, ‘me u ile oa ithuta eng boiphihlelong boo?**

## Maphelo a Fetotsoeng a Etsa Phapano

**“Eitse ha ba bona ho tiea ha Petrose le Johanne, athe ba tseba hobane ke batho ba sa rutehang, e le batho feela, ba makala, ‘me ba lemoha hobane ba kile ba tsamaea le Jesu”(Liketso 4:13).**

---



---

Kereke ea Testamente e Ncha e ile ea phatloha ke kholo. Ho ile ha kolobetsoa 3,000 ka letsatsi la Pentakonta (Liketso 2:41). Likete tse ling tsa eketseha kerekeng libeke tse fokolang kamor’a moo (Liketso 4:4). Kapele babusi ba hlokomela se etsahalang. Balumeli ba Testamente e Ncha ba ne ba bile le Kreste. Maphelo a bona a ile a fetoha. Ba ne ba fetotsoe ke mohau oa Hae, ‘me ba ne ba sitoa ho khutsa.

**Bala Liketso 4:1–20. Ho ile ha etsahala eng moo? Ho ile ha etsahala eng ha marena a sechaba a leka ho khutsitsa Petrose le Johanne? Ba ile ba arabela joang?**

---



---

Balumeli bana ba ne ba le bacha ho Kreste, ‘me ba ne ba lokela ho pheta pale ea bona. Petrose, motšoasi oa lihlapa ea buang haholo, o ne a fetotsoe ke mohau oa Molimo. Jakobo le Johanne, bara ba letolo ba neng ba na le bothata ba ho laola khalefo ea bona, ba ile ba fetoloa ke mohau oa Molimo. Thomase oa ‘melaeli o ile a fetoloa ke mohau oa Molimo. Barutuoa le litho tsa kereke ea pele ba ne ba na le lipale tseo ba ka li phetang, motho ka mong, tseo e leng tsa bona, ‘me ba ne ba sitoa ho khutsa. Bona polelo e matla ea Ellen G. White bukeng ea Steps to Christ: “Hang ho ba motho a tle ho Kreste ho mela pelong ea hae cheseho ea ho tsebisa ba bang ka Jesu motsoalle oa bohlokoa eo a mo fumaneng; ‘nete ena e pholosang e halaletsang ha e ka ke ea koalloya ka pelong.”—Leqephe la 78. Hlokomela hape seo baetapele ba tsa borapeli ba se buileng temaneng ea 16. Ba ananetse phatlalatsa bonnete ba mohlolo o entsoeng kapele ho bona—monna ea folisitsoeng o ne a ntse a eme kapele ho bona. Le har’a tsena tsohle, ba ile ba hana ho fetola chalimo ea bona. Feela, ho sa natse bonyefoli boo ba bona bo phatlalatsa, Petrose le Johanne ba ne ba sa tlo lesa ho fana ka bopaki ba bona.

**Kamano ke e fe pakeng tsa ho tseba Kreste le ho arolelana ka Kreste? Hobaneng ha ho itsebela Kreste ka borona ho le bohlokoa haholo bakeng sa ho tseba ho paka ka Eena hantle?**

## Ho Arolelana Maiphihlelo a Rona

Ho Liketso 26, re fumana moapostola Pauluse a eme e le motšoaruoa kapele ho morena Agripa. A le mona a bua ka kotloloho le morena, Pauluse a fana ka bopaki boo e leng ba hae, a bua ka bophelo ba hae e seng feela ha e ne e le mohlorisi oa balateli ba Jesu; empa ka nako eo, kamor'a tšokoloho ea hae, bophelo ba hae e le paki ea Jesu le tšepiso ea tsoho ea bafu (Liketso 26:8). Ha Pauluse a ne a sokoloha tseleng e eang Damaseka, Morena oa rona o ile a bula le eena a re, “Ke itlhahisitse ho uena, hore ke tle ke u bee mohlanka le paki ea litaba tseo u li boneng le tseo ke tla itsebisa ho uena ka tsona” (Liketso 26:16). Ho arolelana ka tumelo ea rona kamehla e ba taba e feto-fetohang. Ke ho pheta pale ea seo Kreste a re etselitseng sona nakong e fetileng, seo a ntseng a se etsa maphelong a rona kajeno, le ka seo a tla re etsetsa sona kamoso. Ho paka ha se taba e shebileng ho rona. Ke taba e shebileng ho Eena. Ke Molimo o tšoarelang makhopo, o folisang maloetse a rona, o re roesang moqhaka oa lerato le mosa, o re khorisang tse molemo (Lipes. 103:3–5). Ho paka e mpa feela e le ho arolelana pale ea rona ea mohau oa Hae o makatsang. Ke bopaki ba rona ba ho kopana le mohau o makatsang oa Molimo.

**Bala 1 Johanne 1:1–3 ‘me u e bapise le Bagalata 2:20. U bona ho tšoana ho fe? Boiphihlelo ba Johanne bo tšoana joang le ba Pauluse?**

---

Leha Johanne le Pauluse ba bile le maiphihlelo a fapaneng a bophelo, ka bobeli ba teane le Jesu ka bo mong ba bona. Boiphihlelo ba bona le Jesu ha e ea ba bo etsahetseng ka nako e itseng e fetileng eaba bo felile. E ne e le boiphihlelo bo tsoelang pele ba letsatsi le letsatsi ba ho nyakalla leratong la Hae le ho tsamaea leseling la ‘nete ea Hae.

Na tšokoloho ke ntho ea nako e fetileng feela? Talima polelo ea Ellen White holim'a ba neng ba nahana hore tšokoloho ea bona ea nako e fetileng ke eona feela taba ea bohlokoa: “Joalo ka ha e ka ba tsebile letho ka borapeli hang feela, ba ne ba sa hloke ho sokoloha letsatsi le letsatsi; empa e mong le e mong oa rona o hloka hore letsatsi le letsatsi a sokolohe.”—*Manuscript Releases*, pok. 4, leq.46.

**Ho sa natse hore na maiphihlelo a hau a nako e fetileng e bile a fe, leha e ne e le a matla a liketsahalo tse kholo, hobaneng ha ho le bohlokoa ho ba le kamano le Morena letsatsi ka letsatsi, ho utloa boteng le molemo oa Hae le matla letsatsi ka letsatsi? Tlo le karabo ea hau sehlopheng ka Sabatha.**

---

## Matla a Bopaki ba Motho

Ha re keng re talime Pauluse kapele ho Agripa hape. Moapostola Pauluse o ema kapele ho monna enoa, oa ho qetela lelokong la marena a Bajuda, molateli oa Maccabeaus, le oa ntlo ea Heroda. Agripa o ne a re ke Mojuda feela ka pelong e ne e le Moroma. (Sheba The SDA Bible Commentary, pok. 6, leq. 436.) Moapostola enoa ea holileng, a khathetseng ka lebaka la maeto a hae a boromuoa le ntoea, a mehoabali ea ntoea e pakeng tsa botle le bobele, o ema mona, pelo ea hae e tletse lerato la Molimo 'me sefahleho sa hae se khanya molemo oa Molimo. Eng kapa eng e etsahetseng bophelong ba hae, lithoriso le mathata a fe kapa a fe ao a fetileng ho oona, o ntse a ka phatlalatsa hore Molimo o molemo.

Agripa o lekhoneho, oa qeaqea, o thatafetse, ebile ha a ikamahanye le letho la boleng. Ka ho fapana, Pauluse o tletse ka tumelo, o itelletse 'nete, 'me o ema ka mali a hae ho loanela ho loka. Ho ne ho se kamoo phapano e pakeng tsa banna bana e ka totobalang ho feta mona. Qosong ea hae, Pauluse o kopa ho bua 'me o fuoa tumello e joalo ke Agripa.

**Bala Liketso 26:1–32. Pauluse o ile a pakela Agripa joang? Re ka ithuta eng mantsong a hae?**

---



---

Mosa o bula menyako moo ho se natse maikutlo a batho ho a koalang. Pauluse o mosa ho Agripa mona. O mo bitsa “[setsebi sa] mekhoha eohle ea ba-Juda” (Liketso 26:3). Joale o hatela pele ka ho bua ka tšokoloho ea hae.

**Bala pale ea tšokoloho ea Pauluse ho Liketso 26:12–18 'me o talime ka hloko kamoo e amang Agripa ho Liketso 26:26–28. U nahana ke hobaneng ha Agripa a ile a etsa kamoo a ileng a etsa kateng? Ke eng se mo ammeng ka bopaki ba Pauluse?**

---



---



---

Bopaki ba Pauluse ba kamoo Jesu a fetotseng bophelo ba hae bo ile ba ama morena ea neng a se na Molimo ka tsela e matla. Ha ho na bopaki bo sebetsang joalo ka ba bophelo bo fetohileng. Bopaki ba bophelo bo fetohileng e le kannete bo na le tšusumetso e hollang ho ba bang. Le marena a se nang Molimo a sisinngoa ke maphelo a fetotsoeng ke mohau. Leha re se na pale e liketsahalo tse matla joalo ka ea Pauluse, bohle re lokela ho bolella ba bang ka se boleloang ke ho tseba Jesu le ke ho pholosa ka mali a Hae.

### Ho Ithuta Haholoanyane:

Bala Ellen G. White, ““Almost Thou Persuadest Me,”” maq. 433–438, ho *The Acts of the Apostles*. Sepheo sa mantlha sa bophelo ba Bokreste ke kamaano le Jesu e nonneng e buleng e nang le botlalo boo re lakatsang ho e arolelana. Leha thuto e nepahetseng e le bohlokoa ha kaalo, ha e ka ke ea nka sebaka sa bophelo bo fetotsoeng ke mohau le lerato. Ellen G. White oa e rapalatsa ha a re: “Mopholosi o ne a tseba hore ha ho khang, ho sa natse na e qaqile ha kae, e ka nolofatsang lipelo kapa ea thuha lek’hok’ho la bolefatše le boikhabo. O ne a tseba hore barutuo ba Hae ba lokela ho fumana mpho ea leholimo pele; hore evangeli e ne e tla atleha ha feela e boleloa ke lipelo tse tse futhumalitsoeng le melomo e entsoeng bokheleke ke tsebo e phelang ea eo e leng tsela, le ‘nete, le bophelo.”—*The Acts of the Apostles*, leq. 31. Bukeng ea *The Desire of Ages*, o tlatselletsa ka mohopolo ona o matla: “Lerato le makatsang la Krete le tla qhibilihisa le ho kokobetsa lipelo, moo ho phetaka lithuto ho ke keng ha fihlela letho.”—*Leqephe la 826*. Ho na le ba nang le maikutlo a hore ho fana ka bopaki ba bona ke taba ea ho kholisa ba bang ka linnete tseo ba li fumaneng Lentsoeng la Molimo. Leha ho le bohlokoa ka nako e tsoanelang ho arolelana linnete tsa Lentsoe la Molimo, bopaki ba boiphihlelo ba rona bo na le kameho e kholo tabeng ea ho lokoloha letsoaling le molato, khotso, mohau, tsoarelo, matla, tšepo, le thabo eo re e fumaneng neong ea bophelo bo sa feleng boo Jesu o bo fanang ntle ho tefo ea letho.

### Lipotso tsa Puisano:

1. U nahana ke hobaneng ha bopaki ba rona b le matla ha kaale ho susumetseng ba bang? Mapaki a ba bang a u amme joang ‘moho le a hau?
2. Sehlopheng, buisanang ka karabo ea lona ea potso ea ho qetela ea Laboraro. Ke hobaneng ha boiphihlelo ba letsatsi le letsatsi le Morena bo le bohlokoa ha kaale, e seng feela ho bopaki ba rona, empa le bakeng sa tumelo ea rona?
3. Ehlile, bopaki bo matla e ka ba bopaki bo atlehang. Ka nako e tsoanang, hobaneng ha bophelo bo nang le Molimo e le karolo ea bohlokoahali ea bopaki ba rona?
4. Arolelana bopaki ba hau le sehlopha. Hopola hore u arolelana ka seo Krete a u etselitseng sona le seo a se bolelang ho uena kajeno. Jesu o etsa phetoho e fe bophelong ba hau?